

# Na kaminda pa Pais Kòrsou (1)

Mas ku un aña kaba, Kòrsou ta prepará pa bira un pais outónomo den Reino. Mayoria di e preparashonnan ta hasí kaba. Den e prók-simo simannan akí gobièrnu ta informábo paso a paso kon el a prepará i kiko a palabrá ku e otro partnernan den Reino. Pasobra pronto lo tin un referèndem atrobe riba struktura estatal.

E promé página informativo akí ta start ku temanan general komo introdukshon di e pakete di palabrashon riba tereno estatal.

## 1. Pakiko referèndem atrobe? Ata pueblo a skohe na 2005 kaba pa Kòrsou outónomo den Reino?

En bèrdat pueblo a skohe kaba na 2005 kua struktura estatal e ta deseá pa Kòrsou. Awor a yega e momentu pa gobièrnu bisa pueblo: ‘Ta esaki nos a negoshá ku nos partnernan den Reino pa krea nos pais nobo. Bo ta di akuerdo kuné?’ P’esei tin referèndem.

## 2. Mi ke sa tur loke gobièrnu a negoshá. Pero pa mas klaridat mi ke freska e memoria promé. Kiko ke men Kòrsou outónomo den Reino atrobe?

Kòrsou outónomo den Reino ke men ku Kòrsou ta sali for di Antia, pero e ta keda den Reino sí. Pa komprendé mihó kiko esei ta kome i bebe, mester kompará e struktura estatal aktual, ku e struktura estatal nobo.

### Struktura estatal manera e ta awor

#### Reino Hulandes

<u>Hulanda</u>	<u>Antia Hulandes</u>	<u>Aruba</u>
	Kòrsou	
	Boneiru	
	Sint Maarten	
	Sint Eustatius	
	Saba	

Aktualmente nos ta forma parti di Reino Hulandes. Por kompará Reino Hulandes ku un kurá grandi, den kua tin diferente kas di famia. Aktualmente tin tres kas di famia den e kurá di Reino. Nan ta: Hulanda, Antia Hulandes i Aruba. Esei ta e tres **paisnan** den Reino Hulandes. Kòrsou no tin su mes kas ainda den Reino Hulandes. P’esei Kòrsou no ta pais ainda. Kòrsou ta biba den kas di Antia Hulandes, huntu ku su rumannan Boneiru, Sint Maarten, Sint Eustatius i Saba. Un tempu, Aruba tambe tabata den Antia. Pero na 1986 Aruba a lès for di Antia i a forma su mes kas apart den Reino. For di e tempu ei Aruba a bira pais outónomo den Reino. Na Aruba nan ta bisa: ‘Status Aparte’.

## 3. Esei ta e situashon aktual. Pero kon e situashon nobo ta bira?

E situashon nobo ta kosé i midí riba e desishon di nos pueblo den referèndem di 2005. Na 2005 pueblo di Kòrsou tambe a skohe pa sali for di e kas di Antia i traha su mes kas. Pueblo a skohe pa traha e kas nobo den e kurá di Reino sí. Sint Maarten ya kaba a skohe esei for

di aña 2000. E pueblonan di Boneiru, Sint Eustatius i Saba, tambe a skohe pa sali for di Antia. Pero nan no ta traha nan mes kas. Nan a skohe pa biba den e kas di Hulanda.

### Struktura estatal manera e ta bira

#### Reino Hulandes

<u>Hulanda</u>	<u>Kòrsou</u>	<u>Sint Maarten</u>	<u>Aruba</u>
Boneiru			
Sint Eustatius			
Saba			

Manera por mira den e kuadro, esaki ta kambia e situashon den e kurá di Reino kompletamente. Pa kuminsá, Antia lo no t’ei mas. Niun pueblo no ke keda eiden. P’esei ta **desmantelá** Antia kompletamente. Kòrsou i Sint Maarten kada un ta bira pais outónomo den Reino. I e islanan BES (Boneiru, Sint Eustatius i Saba) ta bira parti di Hulanda.

Reino Hulandes lo konsistí e ora ei di e paisnan Hulanda, Kòrsou, Sint Maarten i Aruba. I komo nos tur ta keda biba den e mèsun kurá di Reino, nos tur ta keda **partner** den Reino.

## 4. Kiko Kòrsou outónomo den Reino ta nifiká mas aleu?

- Kòrsou lo tin solamente **un** nivel di gobernashon: Lo no tin kuenta di ‘Land’ ku ‘Eiland’ mas. Ke men, lo no tin un gobièrnu sentral ku ministernan, i alabes un gobièrnu insular ku diputadonan. Lo tin **un** gobièrnu i **un** parlamento di Kòrsou.
- Tambe lo tin **un** elekshon. E otro islanan lo no partisipá den nos gobièrnu ni parlamento. No por sosodé mas ku situashon lokal na un isla por influenshá gobernashon di e otro islanan.
- Plaka ku nos produsí na Kòrsou, ta keda pa Kòrsou. Kòrsou no mester hinka plaka mas den un fondo pa yuda e islanan chikitu.
- Kòrsou por konsentrá tur su hendenan, tur su konosementu i tur su medionan den desaroyo di Kòrsou. No mester manehá Antia ku e otro islanan.

**Den e siguiente kapítulo di e página informativo akí, nos lo fiha mas aleu riba outonomia di Kòrsou.**



**Kòrda riba nos anochi informativo na Biblioteca Públiko djarason anochi 7or. Bo ke un enkuentro informativo den bo barío òf pa bo grupo? Yama 4633225 pa un sita.**